



Extrait de la revue **SingulierS** du 1^{er} trimestre 2012

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : Textes

Mêsse Houyeû dè payis d' Lîdje

François NYNS
(wallon de Grâce-Hollogne)

Dji wadjreû on hêna di fris' pèkèt : c' èst a câse dè vî houyeû d' Wintêrslak, ki dpôy li dièrin.ne Sinte Bâre, li 3 d' décimbe 2011, vo m' la dimnou Mêsse Houyeû dè payis d' Lîdje.

V' polez rîre ! Mi ossi, dji pinsséve ki totes lès confrêrêyes n' èstît k' dè folklôre. Èt bin, mon colon, dj' ènn-a rimnou tot mouwé èt ç' n' èst nin po rîre.

Cwantes fêyes n' avans-gne nin asticoté Djêf Ulburghs cand i rimnéve â Bièrlêu, avou l' grosse mèdaye di Blègny âtoû di s' hanète èt ki pindéve so si stoumac ?

Èl prindéve adon a deûs mins èt l' rabrèssîve come si ç' avasse situ li sint sacremint. Madjine-t-on on curé, èt Flamind â d' dizeûr dè martchî, dimni citwèyin d' oneûr di Gâce-Hologne èt Mêsse Houyeû dè Payis d' Lîdje ? N' a nou pâpe k' âye mèrité çoula !

Po l' mons', treûs cints djins â dîner. Ine cinkantin.ne è fond dè beûr. Èt tote ine sinte djoûrnêye oyi crohî l' walon âtoû d' lu. Riveûy dè vîs camas, s' ènnè fé dè novès ; dihez-m' on pô : wice pout-on viker on tél boneûr po l' djoû d' oûy ?

Vos n' riyez pus ? Walon èt Houyeû, c' èst deûs mots ki vont si bin-èssonle. Vola l' vrêye. Èt dpôy ci djoû la, vo-m' la come so 'ne nûlêye ; i m' arive min.me dè fé m' prandjîre avou m' mèdaye è m' hanète.

C' èst mi ki, c' èsmi k' a, c' èst mi k' èst... Way po m' matricule.

Mins dju n' wèze nin trop' riloukî lès fotos ki m' fi a pris èt mètou dvins in-albom po m' novèl an. Dj' a toti come dè steûles divins lès-oûys. Bâh ! Ci n' èst k' dè lâmes après tot. Dè lâmes di boneûr, tot l' min.me.

Â Bièrlêu, on m' lome asteûre l' ome k' a l' solo so si stoumac. Fâte d' l' aveûr è m' potche, come Lahaut, da Jean Louvet. A Blègny, dj' a passé onk dè pus bès djoûs di m' vèye.

Dispôy ci djoû la, dji cwîre, è m' trô d' Ali Baba, èt trouve dè lîves – lès pus bès provnèt d' Châlèrwè –, dè scriyèdjès, dè tchansons, è walon, so lès Houyeûs. Sins roûvî lès botrèsses.

Mutwèt k' on djoû, s' i plê-st-a Diu, i n' ârè-st-ine vitrine a Blègny avou cès trézôrs la. An tous lès cas, volâreût 'ne bone keûre po l' walon. Sèreût-ce li moumint d' aveûr ine cârte di vizite ? Dji m' èl dimande. Avou mès tites di nôblèsse ?

Si v's-avez dè-îdèyes, mi tèlèfone, lu n' a nin candjî : 04 2312000.

Malêjis mots

Bâre = Barbe / **beûr** = bure, puits de mine s'ouvrant au jour / **botrèsse** = femme qui porte la hotte / **crohî** = croquer / **fris'** = frais / **hanète** = cou, nuque / **hêna** = petit verre / **houyeû** = mineur / **keûre** = cure, souci, soin / **nûlêye** = nuage / **prandjîre** = sieste / **steûle** = étoile / **wice** = où.